


---

shrI hanumAna chAlIsA

——  
श्रीहनुमान चालीसा

——  
Document Information



---

Text title : hanumAna chAlIsA

File name : hanuman40.itx

Category : chAlisA, hanumaana, hindi

Location : doc\_hanumaana

Latest update : October 1, 2010

Send corrections to : [sanskrit@cheerful.com](mailto:sanskrit@cheerful.com)

---

This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

**Please help to maintain respect for volunteer spirit.**

---

Please note that proofreading is done using Devanagari version and other language/scripts are generated using **sanscript**.

---

April 25, 2022

*sanskritdocuments.org*

---



श्रीहनुमान चालीसा

दोहा

श्रीगुरु चरन सरोज रज निज मनु मुकुरु सुधारि ।  
बरनऊँ रघुवर विमल जसु जो दायकु फल चारि ॥  
बुद्धिहीन तनु जानिके सुभिरौँ पवनकुमार ।  
बल बुद्धि विद्या देहु मोहिँ हरहु कलेस विकार ॥

चौपाई

जय हनुमान ज्ञान गुन सागर ।  
जय कपीस तिहुँ लोक उजागर ॥  
राम दूत अतुलित बल धामा ।  
अंजनिपुत्र पवनसुत नामा ॥  
महावीर विक्रम बजरंगी ।  
कुमति निवार सुमति के संगी ॥  
कंचन बरन बिराज सुबेसा ।  
कानन कुंडल कुंचित केसा ॥  
हाथ बज्र औ ध्वजा बिराजै ।  
काँधे मूँज जनेऊ साजै ॥  
संकर सुवन केसरीनंदन ।  
तेज प्रताप महा जग बंदन ॥  
विद्यावान गुनी अति चातुर ।  
राम काज करिबे को आतुर ॥  
प्रभु चरित्र सुनिबे को रसिया ।  
राम लखन सीता मन बसिया ॥  
सूक्ष्म रूप धरि सियहिँ दिखावा ।  
बिकट रूप धरि लंक जरावा ॥  
भीम रूप धरि असुर सँहारे ।

रामचंद्र के काज सँवारे ॥  
 लाय सजीवन लखन जियाये ।  
 श्रीरघुबीर हरषि उर लाये ॥  
 रघुपति कीन्ही बहुत बडाई ।  
 तुम मम प्रिय भरतहि सम भाई ॥  
 सहस बदन तुम्हरो जस गावैं ।  
 अस कहि श्रीपति कंठ लगावैं ॥  
 सनकादिक ब्रह्मादि मुनीसा ।  
 नारद सारद सहित अहीसा ॥  
 जम कुबेर दिगपाल जहाँ ते ।  
 कवि कोबिद कहि सके कहाँ ते ॥  
 तुम उपकार सुग्रीवहिं कीन्हा ।  
 राम मिलाय राज पद दीन्हा ॥  
 तुम्हरो मंत्र बिभीषन माना ।  
 लंकेस्वर भए सब जग जाना ॥  
 जुग सहस्र जोजन पर भानू ।  
 लील्यो ताहि मधुर फल जानू ॥  
 प्रभु मुद्रिका मेलि मुख माहीं ।  
 जलधि लाँघि गये अचरज नाहीं ॥  
 दुर्गम काज जगत के जेते ।  
 सुगम अनुग्रह तुम्हरे तेते ॥  
 राम दुआरे तुम रखवारे ।  
 होत न आज्ञा बिनु पैसारे ॥  
 सब सुख लहै तुम्हारी सरना ।  
 तुम रच्छक काहू को डर ना ॥  
 आपन तेज संहारो आपै ।  
 तीनों लोक हाँक तें काँपै ॥  
 भूत पिसाच निकट नहिं आवै ।  
 महाबीर जब नाम सुनावै ॥  
 नासै रोग हरै सब पीरा ।  
 जपत निरंतर हनुमत बीरा ॥  
 संकट तें हनुमान छुडावै ।

मन क्रम बचन ध्यान जो लावै ॥  
सब पर राम तपस्वी राजा ।  
तिन के काज सकल तुम साजा ॥  
और मनोरथ जो कोई लावै ।  
सोई अमित जीवन फल पावै ॥  
चारों जुग परताप तुम्हारा ।  
है परसिद्ध जगत उजियारा ॥  
साधु संत के तुम रखवारे ।  
असुर निकंदन राम दुलारे ॥  
अष्ट सिद्धि नौ निधि के दाता ।  
अस बर दीन जानकी माता ॥  
राम रसायन तुम्हरे पासा ।  
सदा रहो रघुपति के दासा ॥  
तुम्हरे भजन राम को पावै ।  
जनम जनम के दुख बिसरावै ॥  
अंत काल रघुबर पुर जाई ।  
जहाँ जन्म हरिभक्त कहाई ॥  
और देवता चित्त न धरई ।  
हनुमत सेई सर्व सुख करई ॥  
संकट कटै मिटै सब पीरा ॥  
जो सुमिरै हनुमत बलबीरा ॥  
जै जै जै हनुमान गोसाई ।  
कृपा करहु गुरु देव की नाई ॥  
जो सत बार पाठ कर कोई ।  
छूटहि बंदि महा सुख होई ॥  
जो यह पढ़ै हनुमान चलीसा ।  
होय सिद्धि साखी गौरीसा ॥  
तुलसीदास सदा हरि चेरा ।  
कीजै नाथ हृदय महुँ डेरा ॥

दोहा

पवनतनय संकट हरन मंगल मूरति रूप ।


राम लखन सीता सहित हृदय बसहु सुर भूप ॥

आरती


मंगल मूरती मारुत नंदन  
सकल अमंगल मूल निकंदन  
पवनतनय संतन हितकारी  
हृदय बिराजत अवध बिहारी  
मातु पिता गुरू गणपति सारद  
शिव समेठ शंभू शुक नारद  
चरन कमल बिन्धौ सब काहु  
देहु रामपद नेहु निबाहु  
जै जै जै हनुमान गोसाईं  
कृपा करहु गुरु देव की नाई  
बंधन राम लखन वैदेही  
यह तुलसी के परम सनेही

॥ सियावर रामचंद्रजी की जय ॥

---

——  
*shrI hanumAna chAlIsA*

pdf was typeset on April 25, 2022

——  
Please send corrections to [sanskrit@cheerful.com](mailto:sanskrit@cheerful.com)

